



9. august 2013

UKA2013/68

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matu-muuna saqqummiuppara:

Partiit arlaat pisortanut akiitsoqarpat, politikkikkut sulinermut pisortat tapiissutaasa noqinneqarsinnaalernissaat qulakkeerniarlugu inatsisissamut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Andreas Uldum, Demokraatit)

Tunngavilersuut

Politikkikkut partii inatsisit atuuttut naapertorlugit peqatigiiffiuvoq namminersortoq, aningaasaqarnerminullu nammineq akisussaasoq. Partii taamaasilluni akiitsoqalersinnaavoq, partiip akilissallugu akisussaaffigisaanik. Partiip akiitsuni sumiginnarpagit, partii – allatullu peqatigiiffittut suliffittulluunniit namminersortutut – akuerisariaqarpaa akiitsoqarfiup inatsisit atuuttut naapertorlugit akiliisitsiniarsinnaanissaa.

Uani iluaqutaasumik eqqartorneqarsinnaapput politikkikkut partiit pisortanut akiitsui aamma akiitsoqarfinnut namminersortunut akiitsui. Politikkikkut partiip akiitsoqarfinnut namminersortunut akiitsui pisortat akiliisitsiniartarfiit aqputigalugit akilersinniarneqarsinnaapput (Akiliisitsiniartartoq). Tamanna partiip akiitsoqarfiullu akunnerminni iluarsisassaattut isigisariaqarpoq.

Pisortanut akiitsut tassaasinnaapput akileraarutinut A-nut akilinningsuukkat, innaallagissamut, imermut kiassarnermulluunniit akiitsut imaluunniit bingortoqarsimatillugu akitsuutitut akilinningsuukkat. Demokraatini isumaqarpugut, pisortanut akiitsut siunissami akilerneqarsinnaasariaqartut, Namminersorlutik Oqartussat partiinut tapiissutaat atorlugit.

Isertorneqassanngilaq, partiit iseritaasa amerlanerpaartaat toqqaannartumik pisortanit tapiissutaammata Inatsisartut Inatsisaat nr. 1 31. maj 2001-meersoq naapertorlugu, taanna kingullermik allannagortinneqarpoq politikkikkut sulinermut aningaasatigut tapiissutit pillugit Inatsisartut Inatsisaat nr. 25 18. november 2010-meersoq aqputigalugu.

Paasiniarlugu politikkikkut sulinermut tapiissutit atorlugit Inatsisartuni sinniisuutitaqartup partiit akiitsullit akiitsui akilersinneqarsinnaanersut, § 37 tunngavigalugu Naalakkersuisunut Demokraatit apeqquteqarnikuupput (Normu 153/2012). Naalakkersuisut akissutaat ersarippoq;



maannakkt malittarisassat naapertorlugit politikikkut sulinermut tapiissutit noqinneqarsinnaanngillat.

Demokraatini isumaqarpugut naapertuilluernerunngitsoq periarfissap tamatuma atuutinnginnera. Soorunami inatsisit sananeqartariaqarput aamma partiit kommuninut aamma/imaluunniit Namminersorlutik Oqartussanut akiitsuminnik sumiginnaasimasut, Namminersorlutik Oqartussaniit ukiumoortumik tapiissutisiaannik ilannganneqarsinnaanngorlugit.

Naalackersuisut apeqqummut akissutaanni, Naalackersuisut tikkuussipput inatsisip qanoq naleqqussarneqarsinnaaneranut, taamaasilluni politikikkut tapiissutit noqinneqarsinnaalernissaat anguneqassappat. Issuaaneq aallartippoq:

” Naalackersuisunut kommuninulluunniit akiitsoqarneq pissutigalugu inatsisartut politikkimik suliaqarnermut tapiissutigisartagaasa tunniunnaversaarnissaat inatsisartut pisortanut akiitsunik akiliisitsiniartarnermi akiitsoqalernaveersaartitsinermilu inatsisaat tunngavigissallugu tulluernerpaasorinassaaq. Inatsimmik atuutsitsinermi iliuusissaq tassaassaaq pgisanik qularnaveeqqutissanngorlugugit arsaarinnineq ”.

Neriuppugut amerlanerussuteqartut siunnersuut pineqartoq ilalerumaaraat.

Pisortanut aningaasaqarnikkut allaffissornikkullu kingunissai.

Pisortanut aningaasaqarnikkut allaffissornikkullu kinguneqassanngilaq. Paarlattuanik siunnersuutip pinngitsoortissavaa, pisortat partiinut pisortanut akiitsulinnut pisariaqanngitsumik tapiissuteqartarnissaat.

Namminersorlutik inuussutissarsiortunut aningaasaqarnikkut allaffissornikkullu kingunissai.

Namminersorlutik inuussutissarsiortunut aningaasaqarnikkut allaffissornikkullu kinguneqassanngilaq.

Innuttaasunut aningaasaqarnikkut allaffissornikkullu kingunissai.

Innuttaasunut aningaasaqarnikkut allaffissornikkullu kinguneqassanngilaq.